



2022-mut Nunatta Karsiata naatsorsuutaasa akuersissutigineqarnissaannik siunnersuut.

(Aningaasaqarnermut Akileraartarnermullu Naalakkersuisoq)

(Aappassaaneerneqarnera)

Siullermik Kukkunersiuinermut ataatsimiititaliami 2022-mut Nunatta Karsiata naatsorsuutaasa suliarineranut atasumik pitsaasumillu suleqatigiilluarsimanitsinnut qujarusuppunga.

Ilanngussanni uani suliaq ataaseq ukkatarequsuppara, Demokraatit Kukkunersiuinermut ataatsimiititaliami isumaqatiginngisaat, ilaasortanit allanit isumaqatigineqartoq. Immikkoortoq taanna tassaavoq Inatsisit Tunngaviusussat pillugit Isumalioqatigiissitamut tunngassuteqarpoq.

Nassuilluinnartumik eqqortoq oqaatigisigu, tassalu; Inatsisit Tunngaviusussat pillugit Isumalioqatigiissitaq paatsiveqarsimanngilaq. Suliat arlaleriarlutik kinguaattoorsimapput naatsorsuutigisamiillu annertunerujussuarmik akeqarsimallutik. Taakkulu kukkunersuisut nalunaarutaannik arlaannulluunniit attuumassuteqanngitsuniit isornartorsiuinernik arlaqartunik kinguneqarsimallutik.

Kukkunersiuinermut nalunaarutini ilaatigut makku isornartorsiorneqarput:

- Isumalioqatigiissitaq tamatigut sipaarniarnermik takutitsisarsimanngilaq.
- Isumalioqatigiissitaq ilaatigut suliarisassat allassimaffiat pigineqartoq ataqqisarsimanngilaa.
- Isumalioqatigiissitaq allattoqarfiani sulisut annertuumik taarseraassimapput, sulinermi silaannaq unamminartoqarsimasoq malunnarluni aammalu ilaatigut inatsisitigut piginnaasat pisariaqartut amigaatigineqartarsimallutik.

Ilungersunartutut tiguneqartariaqarput. Pisortat aningaasaataat tamatigut annertusaaraluni ingerlanneqartariaqarput, isumalioqatigiissitarlu soorunami suliasat allattorsimaffiannik ataqqinnittussaavoq.

Demokraatini isumaqarpugut, pisumi akisussaanerpaaffik annerpaaq inissisimasoq Naalakkersuisuni, Inatsisit Tunngaviusussat pillugit isumalioqatigiissitaq nakkutigilluarnissaanut pisussaaffini sumiginnarsimagamikku. Tamanna Naalakkersuisut isornartorsiorneqarnerannik kinguneqartussaagaluarpoq. Tamannalu aamma Kukkunersiuinermut ataatsimiititaliami isumaqatigiissutigineqarpoq. Uagulliuna Demokraatini isumaqaannartugut, Kukkunersiuinermut ataatsimiititaliami ilaasortat sinneri Naalakkersuisunit isornartorsiuinermi sakkukippallaartut, amerlanerussuteqartut akunnattumik isornartorsiuinissaq oqaatigimmassuk. Taamaattumik uagut Demokraatini kisiartaalluta Naalakkersuisut Inatsisit Tunngaviusussat pillugit Isumalioqatigiissitamik sukannersumik isortartorsiorpagut. Neriuppugut, Naalakkersuisut siunissami taamaattunik soorlu assersuutigalugu Inatsisit Tunngaviusussat pillugit Isumalioqatigiissitaq aqutsinermini eqqummaarinnerujumaartut.



Naggasiullugu erseqqissarusuppara Kukkunersiuinermut Ataatsimiitsitaliap ataatsimoorullugu ilassutissatut isumaliutissiissut imarisaanut Demokraatit ilaliimmata. Naalakkersuisut paasissutissaatiminnik Inatsisartunut soqutiginaateqarsinnaasunik peqartillutik tamanik saqqummiisarnissaat naatsorsuutigisinnaasariaqarparput, Inatsisartuniit pitsaasumik tunngavissaqarluartumillu aaliangersaasinnaanissarput qulakkeerniarlugu. Taamaattumik Inatsisartut Ukiaanerani 2021 Uran pillugu inatsimmik suliaqarsimaneranit akuersisimaneraniillu tamanna atuutsinneqarsimanersoq misissorneqarnissaa ilaatigut kissaatigaarput, matumanimi nunarput tassa, Namminersorlutik Oqartussat, taarsiivigineqarnissamut eqqartuussivilersuunneqarneranut attuumassuteqarsinnaammata.

Apeqqut pingaarutilerujussuvoq, arlaanaatigulluunniit sukkavallaamik inernileeriinnginnissaq pingaarutaa naqissuserneqartariaqarpoq, taamaattorli pineqartoq pillugu isumaliutissiisummut ilassut sukkasuumik pitsaasumillu suliarineqarnissaa kaammattuutigerusupparput.

Taamatut oqaaseqaateqarlunga innersuussutigissavara, Deloitte nunatta karsianik kukkunersiuusutut toqqarneqaqqissasoq, aammalu Inatsisartut 2022-mut Nunatta Naatsorsuutaai akuersissutigissagaat.